

12 SEP 2002

Senegal-Sambutan (Bergambar)

PRESIDEN SENEGAL ABDOULAYE WADE DIBERI SAMBUTAN NEGARA

KUALA LUMPUR, 12 Sept (Bernama) -- Presiden Senegal Abdoulaye Wade hari ini diberi sambutan penuh istiadat di Medan Parlimen sempena lawatannya ke Malaysia.

Abdoulaye disambut Yang di-Pertuan Agong Tuanku Syed Sirajuddin Jamalullail Putra dan Perdana Menteri Datuk Seri Dr Mahathir Mohamad.

Sejurus kemudian lagu "Negaraku" dan lagu kebangsaan Senegal dimainkan oleh pasukan pancaragam dari Pusat Kor-Armour Diraja.

Abdoulaye kemudiannya memeriksa perbarisan kehormat Batalion Pertama Rejimen Askar Melayu Diraja terdiri daripada empat pegawai dan 103 anggota yang diketuai Mejar Hamdan Musa.

Ketika itu tembakan meriam 21 das dilepaskan.

Abdoulaye kemudian diperkenalkan kepada barisan anggota Kabinet dan para diplomat asing.

Abdoulaye yang tiba bagi lawatan pertamanya ke negara ini semalam, turut disertai delegasi 30 anggota.

Beliau dijadual mengadakan perbincangan dengan Dr Mahathir di Jabatan Perdana Menteri petang ini dan mendengar taklimat di Unit Perancangan Ekonomi.

Beliau akan diraikan pada jamuan negara di Istana Negara malam ini.

-- BERNAMA

SNS RZS ZB